



UMP, ECERDC rai pelajar cemerlang dan peserta tamat latihan kemahiran dan keusahawanan program empower ECER Mahkota

Seramai 114 pelajar yang memperolehi keputusan cemerlang dalam tiga peperiksaan utama tahun lalu iaitu Ujian Pencapaian Sekolah Rendah (UPSR), PT3 dan Sijil Pelajaran Malaysia (SPM) serta peserta kemahiran dan keusahawanan program empower ECER Mahkota yang berjaya menamatkan program membabitkan 215 peserta dirai dalam Majlis Kecemerlangan Pelajar dan Tamat Latihan Peserta Program Kemahiran dan Keusahawanan Empower ECER Mahkota yang diadakan di Dewan Astaka UMP Kampus Gambang pada 14 April 2015 yang lalu.

Program Empower ECER Mahkota yang dilaksanakan Universiti Malaysia Pahang (UMP) dan Majlis Pembangunan Wilayah Ekonomi Pantai Timur (ECERDC) ini melibatkan 16 sekolah luar bandar dalam melonjakkan prestasi akademik para pelajar di sekolah-sekolah yang terpilih sebagai penerima manfaat daripada inisiatif ini.

Antara sekolah terlibat ialah SK Lepar, SK Runchang, SK Serandu, SK Indera Shahbandar, SK Nenas, SK Peramu Jaya, SK Pekan Jaya, SK Tanjung Batu, SK Nenas dan SK Sri Maulana. Manakala sekolah menengah yang terlibat adalah SMK Lepar Pekan, SMK Indera Shahbandar, SMK Pekan, SMK Nenas, SMK Peramu Jaya, dan SMK Dato' Mahmud Mat.

Program ini dikendalikan secara bersama antara ECERDC dan UMP dengan kerjasama pihak UMP Advanced Education (UAE) dan Persatuan Wanita UMP (Matahari) sejak tahun 2011 bagi meningkatkan pembangunan akademik anak-anak serta peningkatan pendapatan bagi golongan belia, ibu tunggal dan individu-individu sekitar daerah Pekan, Kuantan dan Bera terutamanya yang tidak mempunyai pendapatan tetap.

Majlis penyampaian anugerah disampaikan Pengerusi Jawatankuasa Kesihatan, Sumber Manusia dan Tugas-tugas Khas Negeri Pahang, Dato' Norol Azali Sulaiman. Turut hadir Naib Canselor UMP, Profesor Dato' Dr. Daing Nasir Ibrahim, Pengurus Besar Bahagian Pembangunan Modal Insan ECERDC, Zulkifli Ya'akob, Pengurus Kanan ECERDC, Mohd. Prasad Hanif, Pemangku Pendaftar, Abd. Rahman Haji Safie, Ketua Pegawai Eksekutif UAE, Mohamad Rozi Hassan dan Presiden Persatuan Wanita UMP, Profesor Dr. Mimi Sakinah Abdul Munaim.

Hadir sama Penasihat Persatuan Wanita UMP, Datin Fazia Ali dan Pengurus Projek ECER UMP, Zainal Bahari.

Dato' Norol Azali berkata, pihak kerajaan negeri amat menghargai peranan ECERDC sebagai penggerak program transformasi Wilayah Ekonomi Pantai Timur (ECER) yang banyak melaksanakan program dalam meningkatkan tahap akademik dan kualiti penduduk menerusi program pembangunan yang dikendalikan.

"Hasil usaha pelaksanaan program Empower ECER Mahkota ini dibuktikan dengan kejayaan yang dicapai pelajar yang diraikan hari ini," katanya.

Menurutnya, program kerjasama UMP dan ECERDC ini mencerminkan komitmen kolektif dan sinergi pihak universiti, sekolah, ibu bapa, dan pelajar bagi merealisasikan agenda kecemerlangan akademik pelajar luar bandar. Beliau menasihatkan pelajar agar terus mencipta kejayaan pada masa depan dan agar program ini dapat diperluas untuk dimanfaatkan di lain-lain daerah.

Profesor Dato' Dr. Daing Nasir berkata bermula sebagai 'Sinar ECER' sejak tahun 2011, inisiatif ini terus mendapat perhatian istimewa Kerajaan Duli Yang Teramat Mulia Tengku Mahkota Pahang, Tengku Abdullah Ibtisam Sultan Haji Ahmad Shah yang mengilhankan penjenamaan semulanya kepada 'Empower ECER Mahkota' pada tahun 2012.

"Daripada hanya dua sekolah dan 170 pelajar sebagai penerima manfaat pada tahun 2011, inisiatif Empower ECER Mahkota telah berkembang subur dengan meliputi 16 buah sekolah dan 2,057 pelajar di Daerah Pekan sebagai penerima manfaat bagi tahun 2014," katanya semasa menyampaikan ucapan.

Bermula dengan SK Lepar dan SK Runchang pada tahun kedua pelaksanaan menyaksikan mukim Kuala Pahang turut dilibatkan yang mana terdapat peningkatan peserta program Akademik (449 orang) dan Kemahiran & Keusahawanan (50 orang).

Bagi tahun 2013 pula turut memperlihatkan jumlah peningkatan peserta Kemahiran Akademik (1,781 pelajar) dan peserta Kemahiran & Keusahawanan (50 orang) yang mencecah 1,831 orang, melibatkan kawasan Lepar, Runchang, Kuala

Pahang dan Nenas. Seterusnya pada tahun 2014, sekali lagi UMP diberi kepercayaan meluaskan program di sekitar daerah Pekan yang mencatatkan penglibatan seramai 2257 orang peserta – Akademik (2057 orang) dan Keusahawanan (200 orang).

Manakala pada tahun ini, Kuantan dan Bera merupakan daerah baru yang turut mengikuti program dan seramai 3309 orang peserta yang terlibat merangkumi 3509 orang pelajar dari 49 buah sekolah dan 250 orang peserta Kursus Keselamatan & Kesihatan Pekerjaan (OSH).

Dato' Dr Daing berkata, sinergi antara UMP, ECERDC dan Jabatan Pendidikan Negeri Pahang dalam menggerakkan inisiatif Empower ECER Mahkota di Daerah Pekan ini telah terbukti amat berkesan dari sudut peningkatan aras prestasi akademik, literasi ilmu dan motivasi belajar para peserta yang terlibat.

Beliau menambah, UMP akan terus bekerjasama rapat dengan pihak ECERDC dan Jabatan Pendidikan Negeri Pahang untuk menambahkan lagi keberkesanan aktiviti dan modul yang telah dikenalpasti sesuai untuk para pelajar yang terlibat.

Program akademik yang dijalankan ini termasuklah kelas tambahan, Program Guru Pakar, Program Motivasi Pelajar & Ibu Bapa, Program Sains, Matematik & Teknologi, Program Mencatat Nota Secara Efektif, Program *Super Camp*, Program Kem Pendidikan. Lain-lain adalah Program Skor A Berita Harian, *Empower Add. Math & Physics by Mr. Sunny Yee*, Program Selangkah ke Universiti dan *Program Study Corner*.

Lebih 500 tetamu dalam kalangan pelajar sekolah, peserta kemahiran, guru-guru dan pemimpin masyarakat hadir memeriahkan program.

Peserta kemahiran terdiri daripada Kursus Kulinari (Masakan 1Malaysia), Kursus Penyelenggaraan Automotif, Kursus Membaiki Enjin Bot, Kursus Membaiki Telefon Bimbit, Kursus Tatarias Kecantikan, Kursus Penjagaan Selepas Bersalin, Kursus Dandan dan Spa Rambut, Kursus Pendawaian Elektrik, Kursus Jahitan & Rekaan Fesyen, Kursus Keselamatan & Kesihatan Pekerjaan (OSH) dan Kursus Peningkatan & Lanjutan (EdC).